



KOMUNIKADO PA PRENSA

Fecha
27 di sèptèmber 2016

Kolaboradó di Maneho
Corinne Leysner

Email
corinne.leysner@gobiernu.cw

INSTANSHANAN DI GOBIÈRNU TA PREPARA PA EVENTUAL MAL TEMPU

Willemstad - E dos ministerionan di Gobièrnu ku ta responsabel pa roi i damnan di Kòrsou, a tuma mesora medidanan pa kontrolá e áreanan vulnerabel di Kòrsou, ku por inundá ora tin mal tempu. Minister di Tráfiko, Transporte i Planifikashon Urbano, sra. Suzy Camelia-Romer, i Minister Siegfried Victorina di Ministerio di Salú Públiko, Medio Ambiente i Naturalesa, mesora a pidi nan instanshanan responsabel pa ta alerta i pa tuma tur prekoushon nesesario, si en kaso ta bin mal tempu.

Servisio Meteorológiko Kòrsou, ku ta forma parti di Ministerio VVRP, ta vigilá e situashon di tempu. E diferente modelonan di tempu ta pronostiká ku e wer por pasa relativamente serka di nos pais. No ta sigur ainda si e sistema lo desaroya den un sistema tropikal, no opstante por spera awa seru fuerte i tambe ráfaga di bientu. P'esei ta bon pa tur hende kuminsá aworaki ku prekoushonnan.

Obra Públiko sinembargo, ta hasi un yamada na públiko, i spesífikamente na tur hende den áreanan vulnerabel, pa nan ta konsiente di e posibel konsekuensianan. Stiwa tur kos lòs den kura òf ku ta lòs na e kas. Esaki pa evitá ku awaseru òf bientu fuerte por kousa daño na bo dak òf bentananan. Si en kaso bo kas òf negoshi ta abou i bo sa ku den pasado el a yega di inundá, buska saku ku santu pa purba blòkia e awa for di bo edificio i warda bo propiedatnan mas haltu pa eventual awa no kousa muchu daño.

Último tempu Obra Públiko a limpia mayoria roi riba nos isla, pero den e dianan ku ta sigui ta bai hasi trabounan adishonal na e diferente sitionan, pa si akaso e awa por kai mas tantu ku normal. Tambe a drecha diferente sistema di desague den nos infrastruktura, na por ehèmpel Koraal Specht, Schouwburgweg, Punda i Erosweg. Esaki mester yuda aliviá sierto barío di awa ku ta kai na un kantidat apnormal.

Ta importante pa menshoná ku e maneho di Obra Públiko ta pa mantene vegetashon den e roinan òf palu ta krese ku ta krese den nan besindario. Nan raisnan ta sòru pa e tera ta keda permeabel pa awa por sak den dje. Esei ta bon pa nos tera bira mas fètil. Tambe ta yuda evitá pa awa keda para den barionan kaminda e no tin suficiente manera pa por sigui ku su fluho.



KOMUNIKADO PA PRENSA

Fecha
27 di sèptèmber 2016

Kolaboradó di Maneho
Corinne Leysner

Email
corinne.leysner@gobiernu.cw

Tambe a hasi e preparativonan enkuanto shèlter, pa si akaso hendenan no por keda den nan mes kas. Ora ta nesesario, Gobièrnu lo anunsiá kua shèlter ta habrí i kon pa yega na e diferente edifisio ku por fungi komo shèlter. Aunke ta muchu trempa pa bisa si e sistema aki lo desaroya den un tormenta tropikal òf asta un orkan, semper ta bon pa tur hende tuma e prekoushonnan nesesario.

Gobièrnu ta kòrda tur hende ku bo no por plania un kalamidat, pero bo por prepará p'e si! P'esei, Servisio Meteorológiko ta sigui masha intenso si e disturbio aki, por bira un tormenta ku hopi awaseru i bientu fuerte òf algu pió pa nos isla.

Medidanan ku kada siudadano por tuma ta di soru pa e eventual fluho di awa por pasa dor di bo murayanan di kura pa e no kousa molester pa bo mes i otronan. Konforme lei (BW boek5 artikel 39) no ta permití pa stroba e fluho di awa di un tereno pa otro. Korda riba bo animalnan tambe! Nan tambe tin derecho pa skonde pa awa i pa por drumi na un kaminda seku i seif.

Kontrola bo dak i bo bentananan, awor ku bo tin tempu. Kontrola bo mes tambe si niun roi den bo besindario no tin sushi (potoshi) den dje. No tin niun motibu pa drenta pániko, pero ta bon pa prepara i sigui kon e tempu ta desaroya su mes. Gobièrnu ta sigui mónitòr kiko ta pasa i ta tene publiko bon informá tokante tur desaroyo.